



STATUT

Islamske Zajednice Bošnjaka u Švedskoj - Džemat Göteborg



OPĆE ODREDBE

Član 1

Puni naziv džemata je:

Islamska Zajednica Bošnjaka u Švedskoj - Džemat Göteborg

Bosniakiska Islamiska Samfundet - Församlingen Göteborg

U daljem tekstu "džemat". Skraćenica imena je "IZBUŠ Džemat Göteborg" ili "BIS Göteborg".

Član 2.

Sjedište džemata je Generalsgatan 5, 415 05 Göteborg, Sverige.

Član 3.

Džemat ima svojstvo pravnog lica.

Član 4.

Džemat je sastavni dio Islamske Zajednice Bošnjaka u Švedskoj (IZBUŠ), a time i dio Islamske Zajednice u Bosni i Hercegovini (IZ u BiH).

Član 5.

Svrha džemata je da, u duhu islamskog učenja, čuva i razvija vjerski život među muslimanima na svom području i podstiče ih na vjerske i humanitarne akcije.

Cilj džemata je:

- očuvanje i proklamovanje svih vrijednosti islama,
- islamski odgoj i obrazovanje svih pripadnika džemata,
- osiguravanje uslova izvršavanja islamskih dužnosti svojim pripadnicima.

Svoj cilj džemat postiže:

- organiziranjem vjerske pouke u džematu,
- organiziranjem vjerskih aktivnosti u džematu,
- jačanjem materijalne osnove džemata,
- dosljednim sprovođenjem odluka viših organa Islamske Zajednice, koja će po potrebi biti razmatrane na skupštini,
- njegovanjem bosanskog jezika u skladu sa Deklaracijom o bosanskom jeziku, koju je usvojio Sabor IZ u BiH,
- očuvanjem i proklamovanjem svih vrijednosti Islama,
- propagiranjem trezvenosti i zahtijevanjem da njegovi članovi budu potpuno trezveni u skladu sa Kur'anom i Sunnetom, te svakom drugom korisnom djelatnošću usmjerenom na vjersko, vjersko-kulturno, obrazovno, socijalno i ekonomsko uzdizanje muslimana na svom području.

Član 6.

Džemat svoje djelovanje temelji na Kur'an-i-kerimu i sunnetu Muhammeda, alejhi-s-selam, islamskoj tradiciji Bošnjaka i zahtjevima vremena, te Ustavu IZ u BiH, zakonima Švedske i ovim statutom.

U tumačenju vjere i izvršavanju ibadetskih islamskih dužnosti džemat primjenjuje maturidijski akaid i hanefijski mezheb, stara se za ispravno razumijevanje i življenje islama, štiti vjerska prava muslimana, te osigurava uvjete za prenošenje emaneta s ciljem da svi pripadnici džemata žive u skladu s islamskim normama, a što se ostvaruje promicanjem dobra i odvrćanjem od zla.

Član 7.

Status imama, uvjeti za prijem u službu, prestanak službe, način rada, prava i obaveze te druga pitanja od značaja za rad imama uređuju se posebnim aktom koji donosi Skupština IZBUŠ-a, a koji mora biti usklađen s Pravilnikom o imamima Islamske zajednice i na koji saglasnost daje Rijaset.

Član 8.

Službeni jezici u džematu su bosanski i švedski jezik.

FINANSIRANJE

Član 9.

Imovinu džemata čine vakufska dobra, imovinska prava, novčana sredstva i druga imovina. Imovina džemata služi za djelatnosti kojima se postiže cilj Islamske zajednice i ne može se koristiti u druge svrhe.

Imovina džemata ima status vakufske imovine na koju se odnose pravila i propisi Islamske zajednice o vakufskoj imovini.

Džemat se finansira:

- članarinom na osnovu Pravilnika o jedinstvenoj članarini i vjerskim uslugama IZBUŠ-a,
- procentom prikupljenog zekata i sadekatu-l-fitra,
- procentom prihoda prodaje edicija,
- dobrovoljnim novčanim i drugim priložima svojih članova, te ostalih zajednica, društava, ustanova i sl. i
- drugim sredstvima koje džemat realizira svojim radom

Finansijsko poslovanje Zajednice se vrši putem Bankgirot (255-2990)

Zajednica može imati više otvorenih računa i kod različitih banaka. Sva konta su pod direktnom kontrolom blagajnika.

Računovodstvo unutar zajednice se vodi od strane eksterne firme za računovodstvene poslove.

Zajednica može uzimati kreditne pozajmice samo po osnovu skupštinske odluke.

Džematska finansijska sredstva se ne mogu posuđivati.

Ovlašteni potpisnici dokumenata u ime džemata su pojedinačno predsjednik, sekretar i blagajnik.

ČLANSTVO

Član 10.

Članom džemata može postati svako ko prihvata ovaj statut i ko ispunjava uslove da postane član kroz poreznu članarinu na osnovu Pravilnika o jedinstvenoj članarini i vjerskim uslugama.

Član 11.

Prava člana džemata su:

- da sudjeluje u radu džemata,
- da bira i bude biran u organe džemata,
- da bude informiran o aktivnostima u džematu,
- da daje prijedloge za unaprjeđenje rada džemata,
- da slobodno ispoljava pripadnost islamu i ispunjava islamske obaveze,
- da se islamski odgaja i obrazuje,
- da koristi džematske prostorije za izvršavanje vjerskih obreda shodno važećim pravilima i
- da se obraća organima džemata radi zaštite svojih ličnih i vjerskih prava.

Član 12.

Dužnosti člana džemata su:

- da poznaje i primjenjuje propise Islamske zajednice i da štiti islamske vrijednosti,
- da čuva ugled Islamske zajednice i
- da plaća članarinu.

Član 13.

Članom džemata se prestaje biti smrću, na vlastiti pismeni zahtjev sekretarijatu IZBUŠ-a ili isključenjem zbog grubog kršenja odredbi ovog statuta. Odluku o isključenju donosi IZBUŠ na prijedlog odbora džemata. Odbor džemata može privremeno suspendovati člana do konačne odluke IZBUŠ-a.

Član 14.

Organi džemata su:

- Skupština,
- Džematski odbor,
- Reviziona komisija,
- Izborna komisija i
- Statutarna komisija.

Član 15.

Skupština je najviši organ džemata, a sačinjavaju je svi punoljetni članovi džemata, tj. oni koji su napunili 18 godina.

Skupštinu džemata saziva džematski odbor, a vodi je radno predsjedništvo koje se bira na početku zasjedanja.

Skupština džemata treba biti održana prije skupštine IZBUŠ-a.

Skupština može zasjedati i punopravno odlučivati ukoliko joj prisustvuje natpolovična većina članova džemata. Ukoliko u vrijeme kad je zakazan početak skupštine ne prisustvuje potreban broj članova, početak skupštine se prolongira za 10 minuta. Nakon toga skupština počinje sa zasjedanjem bez obzira na broj prisutnih.

Skupština donosi odluke natpolovičnom većinom prisutnih članova, izuzev odlučivanja o Statutu džemata koji se donosi dvotrećinskom većinom prisutnih članova.

Redovna skupština održava se jednom godišnje i to najkasnije do kraja mjeseca februara. Poziv za redovnu skupštinu se šalje najkasnije dvije (2) sedmice prije održavanja skupštine.



Vanredna skupština se održava ukoliko to zaključi džematski odbor ili ako to zatraži najmanje jedna trećina članova džemata.

Sazivanje, rad i odlučivanje na sjednicama skupštine odvija se prema poslovniku o radu, kojeg donosi skupština džemata.

Skupština džemata je nadležna da:

- donosi odluke koje se tiču organizacije i aktivnosti džemata i vjerskog života u džematu,
- bira članove organa džemata i zastupnike džemata u skupštinu IZBUŠ-a,
- pokreće inicijativu za izgradnju ili kupoprodaju objekata džemata,
- daje smjernice džematskom odboru za preduzimanje mjera s ciljem poboljšanja vjerskog života u džematu,
- razmatra i usvaja izvještaje džematskog odbora o njegovom radu i ocjenjuje njegov rad,
- usvaja godišnji plan rada i budžet džemata i obavlja i druge poslove iz svoje nadležnosti. Džematski odbor upravlja džematom u mandatnom periodu, a saziva se, radi i odlučuje po vlastitom poslovniku o radu, koji mora biti u skladu sa statutom džemata.

Član 16

Džematski odbor ima devet članova i dva zamjenika.

Predsjednika džemata i džematski odbor bira skupština po prijedlogu Izborne komisije. Skupština može dati svoj prijedlog za predsjednika ili članove džematskog odbora na samom zasjedanju.

Predsjednik džemata predstavlja džemat u administrativnim, finansijskim i imovinsko-pravnim poslovima.

Imam džemata je član džematskog odbora po položaju i predstavlja džemat u stvarima vjere. Ukoliko u džematu ima više imama, džematski odbor će odrediti prvog imama i on će obavljati funkciju člana džematskog odbora.

Predsjednik Bemuf-a Göteborg je član džematskog odbora po položaju i predstavnik omladine u odboru džemata.

Prilikom izbora džematskog odbora biraju se i dva zamjenika koji se redovno pozivaju na sjednice odbora i dobivaju pravo glasa ako je neko od članova džematskog odbora spriječen da prisustvuje dotičnoj sjednici. Na određene sjednice po potrebi se mogu pozvati i drugi članovi džemata ili neko drugi, čija stručnost i iskustvo može pomoći u radu.

Džematski odbor je nadležan da:

- osigura uvjete za vjerski život u džematu,
- provodi odluke skupštine džemata i viših organa Islamske zajednice,
- vodi brigu o imovini džemata,
- u koordinaciji sa glavnim imamom učestvuje u odabiru imama u džematu,
- po zaključku skupštine džemata, daje inicijativu za pribavljanje potrebnih odobrenja i investiciono-tehničke dokumentacije za izgradnju, rekonstrukciju i popravku vjerskih objekata u džematu,
- skupštini džemata podnosi izvještaj o radu i izvještaj o finansijskom poslovanju,
- skupštini džemata predlaže plan rada i budžet,



- dostavlja Izvršnom odboru IZBUŠ-a plan rada, budžet, izvještaj o radu i izvještaj o finansijskom poslovanju,
- kao formalni poslodavac odlučuje o zasnivanju i prestanku radnog odnosa i nadoknadama,
- obavlja i druge poslove iz svoje nadležnosti.

Član 17.

Reviziona komisija se sastoji od tri skupštinski izabrana člana i ima zadatak da vrši

- reviziju finansijskog poslovanja,
- praćenje utvrđenog budžeta džemata,
- prati usklađenost rada džematskog odbora sa Statutom, pravilnicima rada te donesenim odlukama skupštine i samog džematskog odbora, a o tome podnosi izvještaj skupštini džemata.

Izborna komisija se sastoji od tri skupštinski izabrana člana i ima zadatak da, na osnovu Izbornih pravila IZ u BiH, skupštini džemata predlože kandidate za organe džemata.

Statutarna komisija se sastoji od tri skupštinski izabrana člana i ima zadatak da samoinicijativno ili na poziv džematskog odbora daje prijedloge i nacрте teksta upravnih i poslovnih dokumenata džemata.

U džematu po potrebi mogu biti formirane i druge komisije.

Član 18.

U organe džemata može biti biran svaki njegov član, sa boravkom u Švedskoj, koji je napunio 18 godina, koji je član IZBUŠ-a najmanje tri godine prije izbora i koji izvršava svoje obaveze u džematu, izuzev uposlenika u džematu.

Član 19.

Nosilac dužnosti u organima džemata može i prije isteka mandata biti razriješen dužnosti ukoliko je:

- njegovo ponašanje i rad u suprotnosti sa islamskim normama,
- njegov rad suprotan propisima i odlukama organa Islamske zajednice i džemata,
- nesposoban ili nemaran u izvršavanju obaveza u organu u koji je izabran,
- zloupotrijebio svoj položaj i
- podnio ostavku.

Odluku o razrješenju dužnosti donosi džematski odbor, s tim da se ta odluka mora potvrditi na prvoj narednoj skupštini džemata.

ZAVRŠNE ODREDBE

Član 20.

Svi organi džemata biraju se na mandat od dvije godine.

Član 21.

Svi organi džemata dužni su imati vlastiti poslovnik o radu. Sve što nije precizirano ovim statutom, organi džemata reguliraju poslovníkom o radu.



Član 22.

Džemat primjenjuje i koristi prema važećim pravilima svoj vizuelni identitet (znak, usvojen od strane Sabora IZ u BiH, i logo Islamske zajednice Bošnjaka u Švedskoj - Džemat Göteborg).

Član 23.

Džemat ima pečat okruglog oblika sa znakom Islamske zajednice na kojem je ispisan puni naziv džemata na bosanskom i švedskom jeziku.

Član 24.

U slučaju da džemat prestane s radom, sva novčana sredstva koja se u tom trenutku zateknu u kasi džemata, kao i sva pokretna i nepokretna imovina postaju vlasništvo IZBUŠ-a.

Odluku o prestanku rada džemata donosi Rijaset IZ u BiH, na prijedlog skupštine džemata.

Član 25.

Promjene ovog statuta se potvrđuju kroz odluke dvije uzastopne Skupštine.

Član 26.

Ovaj statut je usvojen na skupštini džemata, održanoj dana ____25. Maj 2025____ i stupa na snagu istog dana.

Predsjedavajući skupštine džemata:

Haris Ibrović